

DOMINGU XXVIII TEMPU KOMÚN – TINAN B

TEMA

Liturjia Domingu da-28 konvida ita atu refleto kona-ba hilin sira ne'ebé ita halo; fó hanoin mai ita katak la'ós buat hotu ne'ebé nabilan mak osan-mean no katak presiza, dala ruma, hakribi valór ruma ne'ebé mohu lalais, atu bele manán valór sira moris loos no rohan-laek nian.

Iha *leitura dahuluk*, matenek-na'in ida Israel nian apresenta mai ita “knananuk ida ba sabedouria”. Testu konvida ita atu manán “sabadouria” loos (don ida husi Maromak) no husik valór efémeru sira ne'ebé la realiza ema nu'udar ema. “Matenke-na'in” loos mak ida-ne'ebé hili atu rona Maromak nia proposta sira, aseita dezafiu sira, la'o tuir dalan ne'ebé Nia hatudu.

Evanjellu apresenta mai ita mane ida ne'ebé hakarak alkansa vida eterna. Jezús konvida nia atu husik ninia rikusoin sira no hili “dalan Reinu nian” – dalan partilla nian, solidariedade nian, doasaun nian, domin nian. Iha dalan ida-ne'e – Jezús garante ba ninia dixípulu sira – mak ema bele realiza tomak nia an no hetan moris rohan-laek.

Leitura daruak konvida ita atu rona no simu Maromak nia Liafuan ne'ebé Jezús fó nu'udar proposta. Liafuan moris, efikás, atuante. Bainhira simu/akolle iha fuan, Liafuan ne'e nakfilak ema, hafoun nia, tulun atu dixerne kona-ba di'ak no aat no halo opsaun korreta, hodi hatudu ba nia dalan loos atu to'o ba moris nakonu no definitiva.

LEITURA I – Sab 7,7-11

“Livru Sabedouria” nian mak livru resente liu Testamentu Tuan nian (primeira metade sék. I mK). Autór mak judeu ida Diáspora nian esprime an tuir konseitu no termu sira mundu eléniku nian, – halo elojiu ba “sabadouria” israelita, no fó sai sorte ne'ebé sei kona ema justu no ema aat no hodi foti ezemplu husi istória Ézodu nian hatudu sorte ne'ebé ema Ejitu hetan (idólatra sira) no ebreu sira nia sorte (fiél ba Jahwéh).

Ita iha Alexandria (Ejitu), iha meu ida elenizadu tebes. Kultura sira seluk – nomeadamente ida judiaka– la folin no hetan desprezu. Kolónia boot judaika rezidente iha sidade koñese, liuliu iha Ptolomeu Alexandre (106-88 mK) no Ptolomeu Dionísio (80-52 mK) sira-nia ukun, persegisaun todan. Matenek-na'in sira mundu eléniku nian buka hatudu, husi sorin ida, kultura grega nia superioridade no, husi sorin seluk, inkongruénsia proposta moris judaizmu nian... Autór fó korajen ba judeu sira atu keta husik sira-nia fiar, atu keta “moderniza an” no loke an ba valór sira kultura elénika nian.

Iha ambiente ne'e mak autór matenek-na'in Livru Sabedouria nian deside defende valór sira fiar no kultura nia Povu nian. Nia iha objetivu rua: hodi diriye ba maluk judeu sira (iha mundu paganizmu, idolatria no imoralidade nian), nia konvida sira atu deskobre fali bei-ala sira nia fiar no valór judaiku sira; diriye ba pagaun sira, nia konvida atu kontra idolatria no adere ba Jahwéh, Maromak loos no mesak... Ba sira hotu, nia hateten katak, Jahwéh de'it mak garante “sabadouria” loos, ksolok loos.

Testu ne'ebé propoin mai ita integra parte daruak livru nian (kf. Sab 6,1-9,18). Nia apresenta “elojiu sabedouria nian”. “Elojiu sabedouria nian” bele fahe ba pontu tolu... Iha dahuluk (kf. Sab 6,1-21), hetan ezortasaun ida ba liurai sira iha sentidu atu manán “sabadouria”; iha daruak (kf.

Sab 6,22-8,21), iha deskrisaun kona-ba natureza no propriedade sira “sabedouria” nian, apresenta iha-ne’e nu’udar valór importante liu entre valór sira ema bele manán; iha datoluk (kf. Sab 9,1-18), aparese autór nia orasaun naruk ida, husu “sabedouria” husi Jahwéh.

“Sabedouria” ne’e mak, fundamentalmente, kapasidade atu halo hilin korreta sira, atu foti desizaun loos sira, atu hili valór loos sira ne’ebé lori ema ba ézitu, ba realizasaun, ba ksolok. Iha “matenek-na’in” Israel nia perspetiva, “sabedouria” mai husi Maromak no don ida Maromak oferese ba ema hotu ne’ebé iha fuan disponivel atu akolle. Tan ne’e, presiza iha tilun atentu atu rona no fuan disponivel atu akolle “sabedouria” ne’ebé Maromak hakarak oferese ba ema hotu. Autór “elojiu sabedouria nian” apresenta nia an nu’udar liurai Salomão (maski nunka refere liurai ne’e nia naran ho modu esplísitu). Loloos, “Livru Sabedouria” nian la mai husi Salomão (tanba hakerek iha sék. I mK, husi judeu ida Diáspora nian, karik Alexandria nian); maibé Salomão, protótipu liurai metenek-na’in ba israelita sira, mak ema ne’ebé di’ak atu apresenta no hameno “sabedouria” ba ema hotu.

MENSAJEN

Salomão husu “sabedouria” ba Maromak no nia hetan (vers. 7). Iha ne’e iha aluzaun diskreta ba epizódiu haktuir iha 1 Re 3,5-15, ne’ebé konta oinsá Salomão, liurai foin-sa’e hela no laho esperiénsia, bá to’o santuáriu/uma-lulik iha Guibeon no husu ba Maromak “fuan ida nakonu ho matenek atu ukun povu, atu dixerne entre di’ak no aat” (1 Re 3,9); no Maromak, hodi korresponde ba pedidu/hahusuk ne’e, haraik ba nia “fuan matenek no perspikás” (1 Re 3,12).

Ba liurai, “sabedouria” sai valór aas liu kbiit, rikusoin, saude, beleza, no soin seluk rai nian (vers. 8-10a). Nia maka roman ne’ebé hatudu dalan no pemite atu dixerne opsaun korreta atu foti. Matenek mak valór ida ne’ebé dura, mai husi Maromak no lori ema atu hetan moris loos, ksolok ba nafatin.

Maski nune’e, “sabedouria” la hadook liurai ne’e husi soin seluk... Iha kontráriu, opsaun ba sabedouria halo nia hetan “soin hotu” no “rikusoin sura-laek” (vers. 11), basá sabedouria maka baze ba sira hotu. Nia maka permite atu goza soin rai ne’e nian ho maturidade no ekilfbriu, laho obsesaun no kaan, hodi koloka iha fatin loos no la husik atu soin sira maka gia matenek-na’in nia moris no manda nia iha nia opsaun sira.

LEITURA II – Heb 4,12-13

Ita haree ona iha domingu kotuk katak, Surat ba Ebreu sira mak sermaun ida ba comunidade sarani sira ne’ebé moris iha monotonia no mediokridade, ne’ebé husik dezánimu kontamina sira no monu ba sedusaun doutrina balun ne’ebé la koerente ho fiar ne’ebé simu husi apóstolu sira... Objektivu autór nian mak estimula moris iha kompromisu sarani no lori fiar-na’in sira ba fiar ida koerente no komprometida liután.

Iha sentidu ne’e, autór apresenta Kristu nia mistériu, amlulik boot liu, ho misaun atu lori fiar-na’in sira ba relasaun ho Aman no integra sira iha Povu amlulik, katak comunidade sarani. Sira sei halo sira-nia moris sakrifísiu ida hahí nian, saran an nian no domin nian. Autór oferese ba sarani sira aprofundamentu ida fiar sarani nian, ho kbiit atu revitaliza sira-nia esperiénsia fiar nian, ne’ebé sai fraku tanba akomodasaun, monotonia no tan entuziasmu insiál sai malirin.

Testu ne’ebé ohin propoin inklui iha parte daruak Surat nian (kf. Heb 3,1-5,10). Autór apresenta Jezús nu’udar amlulik fiél no laran-sadia ne’ebé Aman haruka mai mundu atu muda ema sira nia

fuan no halo sira hakbesik ba Maromak. Sira presiza de'it "fiar" iha Jezús – katak, rona ho atensaun Kristu nia proposta sira, atu akolle iha fuan no nakfilak sira iha jestu konkreту moris nian.

Testu ne'e hanesan knananuk ida ba Maromak nia Liafuan ne'ebé Jezús Kristu lori ba ema sira.

MENSAJEN

Maromak nia Liafuan ne'ebé Jezús haklaken ba ema sira la'ós konjuntu ida fraze sira ne'ebé mamuk, laklaru, estéril, ne'ebé fó hatene ba ema sira maibé "tama husi tilun ida no sai husi tilun seluk", no iha impaktu ba ema sira ne'ebé rona ninia moris: Maromak nia Liafuan mak Liafuan moris, atuante, transformadora no efikás, no bainhira rona ona nia, tama iha ema nia fuan hanesan surik kro'at no nakfilak ema nia sentimentu, ema nia hanoin, ema nia valór sira, opsaun sira, atitude sira.

Hodi tama iha fuan, Maromak nia Liafuan sai juiz ba ema nia hahalok sira. Iha sentru ne'e, katak ema nia fuan, iha-ne'ebé forma sentimentu sira, iha-ne'ebé moris hanoin sira, iha-ne'ebé define valór sira, iha-ne'ebé halo opsaun sira (tuir antropolojia judaika, iha fuan maka buat hotu ne'e akontese), Maromak nia Liafuan hodi konfronta an ho ema nia hakarak sekretu/subar sira, ho ninia intensaun loos sira, ho valór sira ne'ebé ema tau nu'udar prioridade, ho sinseridade pozisaun nian ne'ebé ema asume iha nia relasaun ho Maromak, ho mundu no ho ema seluk... No Maromak nia Liafuan apresia, dixerne, iha valór no fó sai ninia julgamentu kona-ba ema.

Maromak nia Liafuan, maski hanesan frajil no fraku, nia maka forsa desiziva ida ne'ebé hakonu istória no lori ema ba vida no salvaun.

EVANJELLU – Mc 10,17-30

Depoizde husik "uma" (kf. Mc 10,10), Jezús kontinua nia dalan liuhusi Judeia no Transjordánia, iha diresaun ba Jericó (kf. Mc 10,46), hodi halo perkursu jeográfiku ida ne'ebé konstitui etapa penúltima ninia viajen nian ba Jerusalém. Dalan ne'ebé Jezús halo ho nia dixípulu sira mak dalan espirituál ida mós, ne'ebé durante dalan ne'e, Jezús kompleta ninia katekeze ba dixípulu sira kona-ba ezijénsia sira Reinu nian no kondisaun sira atu integra an iha komunidadade mesiánika. Leitura ohin nian, lihusi ema riku ida nia kestaun kona-ba kondisaun sira atu alkansa moris rohan-laek, fó oportunidade ba Jezús atu aviza dixípulu sira kona-ba inkompatibilidade entre Reinu no apegu eh kesi an ba rikusoin sira.

Iha teólogo sira Israel nia perspetiva, rikusoin mak bengan Maromak nian (kf. Dt 28,3-8); maibé katekeze tradisionál mós konxiente katak tau konfiansa no esperansa iha soin materiál sira, hanesan hatama venenu ba ema nia fuan, halo nia foti an no auto-suficiente no hadook nia husi Maromak no Ninia proposta sira (kf. Sal 49,7-8; 62,11). Jezús foti fali katekeze tradisionál ne'e, maibé ho perspetiva Reinu nian.

MENSAJEN

Parte dahuluk testu nian (vers. 17-27) maka katekeze ida kona-ba ezijénsia sira Reinu nian no kona-ba tatuir Jezús Kristu nian.

Mane ida hakneak iha Jezús nia oin no husu Nia sá loos maka tenke halo atu "hetan vida eterna" (vers. 17). La'ós ema ruma ne'ebé mai atu kuestiona Jezús atu koko Nia: postura ema nian, nia

atitude respektu nian, hatudu katak nia ema ida sinseru no ho intensaun di'ak, preokupa duni ho kestaun moris rohan-laek.

Iha Testamentu Tuan, ideia moris rohan-laek nian mosu ba dala uluk iha Dn 12,2 no foti fali iha testu seluk ikus nian... Ba teólogo ruma época judaizmu elenístiku nian, ema justu sira ne'ebé mantein fiél ba Maromak no ba Lei sei la hetan kondensasaun iha sheol (iha-ne'ebé matebian sira nia espíritu lori ezisténsia deskoñesidu iha reinu lalatak nian), maibé sei moris hi'as ba vida foun ida, ksolok rohan-laek, ho Maromak (kf. 2 Mac 7, 9.14.36). Moris rohan-laek ne'ebé teólogo sira época ne'e nian ko'alia parese inklui ideia imortalidade nian (kf. Sab 3,4; 15,3). Karik ida-ne'e maka halo mane ne'ebé ba hasoru Jezús la hakmatek: sá maka presiza halo atu bele iha asesu ba moris imortál ne'ebé Maromak rezerva ba ema justu sira?

Jezús nia resposta dahuluk la lori buat foun ruma maibé fó hanoin fali ba ukun-fuan sira Torah nian: “keta oho; keta halo adultériu; keta na'ok; keta foti sasin falsu; keta bosok; hamta'uk aman no inan” (vers. 19). Hanesan katekeze ne'ebé mestre Israél sira halo, sé mak moris tuir ukun-fuan Lei nian, sei simu moris rohan-laek husi Maromak. Moris tuir Maromak nia proposta sira, iha Jezús nia perspetiva mós, eskada uluk atu to'o ba moris rohan-laek.

Maibé mane ne'e esplika katak, husi ki'ik kedas nia moris tuir Lei (vers. 20). Ne'e mak afirmasaun segura no hakmatek, Jezús rasik la kontesta. Mane ne'e la'ós ipókrita ida, maibé fiar-na'in ida ne'ebé haka'as iha vida relijioza no sinseru. Ema ne'e la hatudu orgullu no auto sufisiénsia; ninia atitude no kestaun hatudu inkietasaun, buka definisaun kona-ba dalan loos ba moris rohan-laek. Jezús rekoñese ema ne'e nia sinseridade, onestidade, ema ne'ebé loos duni buka, hateke ba nia “ho simpatia” (vers. 21) no rezolve atu konvida nia atu sa'e tan eskada ida iha dalan ba moris rohan-laek: konvida nia atu integra an iha comunidade Reinu nian.

Ora, eskada foun ne'e iha grau seluk eziyénsia nian... Jezús hatudu rekizitu fundamentál tolu ne'ebé ema sira ne'ehé hakarak integra an iha comunidade Reinu nian tenke asume: keta tau iha sentru moris rasik nian soin ne'ebé liu lais mundu ne'e nian, asume partilla no solidariedade ba ho maun-alin sira be kiak liu, tuir Jezús iha nia dalan domin no saran-an nian (vers. 21). Maski iha vontade di'ak tomak, mane ne'e la preparadu ba eziyénsia dalan ne'e nian no hadook an triste. Marcos esplika katak nia kesi an resin ba rikusoin sira no la prontu atu husik sira (vers. 22). Ema ne'e observante Lei nian; maibé la iha korajen atu hakribi seguransa umana sira, ninia eskema sira, soin rai ne'e nian ne'ebé halo nia fuan sai atan. Ninia inkapasidade atu asume lójika don nian, partilla nian, domin nian, saran-an nian, halo nia la serve ba Reinu. Reinu inkompitel ho egoizmu, ho taka-an, ho lójika “soi” nian, ho obsesaun ba soin sira mundu ne'e nian. Ema riku ne'e nia istória, sai ba Jezús katekeze ida kona-ba Reinu no ninia eziyénsia sira. Dalan Reinu nian maka dalan despojamentu husi an rasik, no tenke halo hodi partilla ho maun-alin sira, hodi saran-an tanba domin. Ora, sé mak la iha kbiit atu husik soin sira ne'ebé liu lais mundu ne'e nian – osan, susesu, prestíjiu, onra, priviléjiu sira, ba buat sira ne'e hotu be kesi ema no hanetik nia atu saran an ba maun-alin sira – labele integra an iha comunidade Reinu nian. Ne'e la'ós de'it difikuldade ida maibé tebes duni imposibilidade ida (“fasil liu ba kuda-kamelu atu liu husi daun nia kuak, duké ema riku ida tama iha Maromak nia Reinu” – vers. 25): soin sira mundu nian impoin lójika ida egoizmu nian, taka-an nian, moris-atan nian ne'ebé la komptivel ho adezaun nakonu ba Reinu no ba ninia valór sira. Eskolante ne'ebé hakarak integra an iha comunidade Reinu nian tenke iha atitude radikál partilla nian, solidariedade nian, doasaun nian.

Marcos propoin mai ita, liutiha reasaun lahakmatek nian husi eskolante sira nia parte hasoru eziyénsia radikalidade nian”: “sé mak bele salva?” (vers. 26). Nu'udar resposta, Jezús apresenta liafuan konfortu nian, katak Maromak nia kbiit boot liufali ema nia frajilidade (“ba ema labele maibé ba Maromak buat hotu bele” – vers. 27). Maromak nia asaun – gratuita no laran-sadia

nian– bele muda ema nia fuan no halo nia hakohak ezijénsia sira Reinu nian. Presiza de’it ema nia disponibilidade atu rona Maromak no husik Nia sadik ema nia moris.

Iha parte daruak testu nian (vers. 28-30) eskokante sira, liuhusi Pedro nia lian, fó hanoin ba Jezús katak sira husik buat hotu atu tuir Nia. Eskolante sira-nia renúnsia la’ós, renúnsia ida ne’ebé justifika iha an rasik no iha valór iha nia an rasik... Jezús nia eskolante sira la hili pobreza tanba pobreza iha nia an rasik maka buat di’ak ida; sira mós la husik ema sira be sira hadomi tanba gosta husik sira... Bainhira Jezús nia eskolante sira renunsia valór ruma (dala barak valór lejítimu no importante), ne’e tanba soin ida boot liu – tuir Jezús no haklaken Evanjellu. Jezús konfirma validade opsaun ne’e nian no asegura ba eskolante sira katak dalan be sira hili la’ós dalan lalakon/perda nian, solidaun nian, mate nian, maibé dalan manán nian, komuñau nian, vida nian.

Eskolante nia opsaun ne’e mundu sei la komprende no sei hakribi. Tanba ne’e, eskolante sira sei hetan persegisaun no taterus. Susar sira ne’e la’ós drama ida imprevistu no lahó sentidu: eskolante sira tenke sai preparadu atu enfrenta sira, basá sira hatene katak sira nafatin tenke moris iha opozisaun ho mundu, enkuantu sira mantein fiél ba Jezús no Evanjellu.

Naran buat sá de’it mak akontese, eskolante sira tenke konxiente katak opsaun ba Reinu no ba ninia valór sira sei garante moris nakonu no ksolok iha rai, iha mundu abanbairua, moris rohan-laek.